



DEO OPTIMO MAX. UNI ET TRINO.

VIRGINI DEI-PARÆ, ET S. LUCÆ,

Orthodoxorum Medicorum Patrono.



QUÆSTIO MEDICA,

QUOD LIBETARIIS DISPUTATIONIBUS,

*manè discutienda, in Scholis Medicorum, die Jovis decimâ
mensis Februarii, anno Domini M. DCC. LXIII.*

PRÆSIDE,

M. THEODORO BARON,

Doctore Medico, Regiæ Scientiarum Academiæ Parisinæ
Socio, Librorum circâ Medicinam, vel Chemiam,
vel Historiam Naturalem, Censore Regio.

An quò Manducantur Accuratiùs, eò Coquuntur Perfectiùs Alimenta?

I.



UMANUM corpus ita est à naturâ comparatum, ut eodem ipso quo viget indefinente humorum circuitu maximas varia per Emunctoria patiatur jacturas. Hæ totius Machinæ ruinam brevi post se traherent, nisi continua earum fieret reparatio. Hinc Alimentorum necessitas quæ beneficum suppeditando succum, Secretionum afferant materiem, requisitam Sanguinis molem conservent, mitem ipsius indolem foveant, vitæque pabula subministrent. Succus ille Chylus est, liquor albus, lacti æmulus, sapore dulcis, in Ventriculo & Duodeno elaboratus, Lacteorum ope, nec non Cisternæ lumbaris & ductûs Thoracici ministerio ad Sanguinem deferendus. Illius confectio Digestionis nomine notissima. Quo peragatur Mechanismo non ita notum; saltem non uno ore ab omnibus recognitum. Alii cum Galeno ventriculi & partium ambientium calori concoquenti negotium illud

omne tribuunt. Solventem alii in Ventriculo humorem acidum cum *Helmonto* admittunt. Illi *Sylvio Deletoe* adherentes, alimenta per Fermentationem in Chylum converti existimant. Sunt qui Chylosi liquoris originem à Putrefactione post *Listerium* deducere audeant. Nonnulli recentiorum altius longè cæteris sapere se opinantes, *Erasistrati* sententiam calculo suo comprobant, Ventriculumque Prælo assimilant, cuius vi Chylum ex alimentis elici asserere non erubescunt. Diverfus omnium error, par autem errandi modus. Omnes secundariam tantùm auxiliatricemque Digestionis causam propriariâ atque unicâ venditant. Tu genuinam assignaveris, si nulli opinionii mancipium factus, quid unaquæque mitigato sensu accepta boni retineat selegeris. Fermentatio, Tritus, Calor, Acidum, quin & ipsa Putrefactio, suo quæque modo alimentorum in Chylum conversionem juvant; juvat & Salivæ succique Gastrici admixtio, tandem operi coronidem imponit Pancreatici liquoris Biliisque accessio. Hæc sunt ad Digestionem requisita, totidemque veluti illius instrumenta. Id ergo omne Digestionis perfectioni ancillari fatearis, quo ad subeundam à tot agentibus inferendam alterationem aptiora redduntur alimenta.

II.

ALIMENTA alia fluida, alia solida. Fluida ferè nullam in ore præviam præparationem requirunt priusquam ad ventriculum detrudantur. Ea est ipsarum tenuitas quâ Lactorum oscula subire valeant. Secus solida. Quæ nisi fluiditatem sibi negatam à naturâ Digestionis ope adepta fuerint, corpus nedom nutriant, ne quidem circulationis vias ingrediuntur. Digestio itaque est alimentorum solidorum in fluida conversio. Hanc multa promovent. Tanta est Salivæ ad id negotii utilitas, ut alimenta hoc succo parcius remollita ingens Ventriculo facessant impedimentum. Hinc qui ridiculè non minus quàm inconsultè Salivam spuendo continenter rejiciunt, difficillimè cibos concoquunt. Alimenta salivali latice semel imbuta ac veluti penetrata. Deglutitionis ope feruntur ad Ventriculû. Ibi Gastrico liquore Salivæ æmulo ulterius emolliuntur, acescentibus cibi reliquiis maritantur, calore loci foveuntur, calefacta à contentis in se particulis æreis expanduntur, hæc expansione Principiorum nexus solvitur, salia ab involucris liberantur, nova ineunt connubiâ, Fermentationemque inchoant aut Putrefactionem, prout in hanc prona sunt si ex Animalibus, aut in illam si ex Vegetabilibus deprompta fuerint alimenta. Interea cibi hospitantis mole ac contactu tirillatæ Ventriculi fibræ lenes nec tumultuarias ineunt contractiones, massamque semifluidam hinc & inde versant ac molliiter premunt, non terunt. Laboris etiam in partem veniunt alternæ Diaphragmatis & musculorum abdominalium contractiones, quæ subiectum sibi Ventriculû agitando ejusque locum indefinenter mutando, intimiorem alimentorum à succo Gastrico nec non à potulentis (quorum ad promovendam Digestionem maxima vis est) dilutionem parant. Verum quâ proportionem diluuntur alimenta, hæc eadem & prementibus potentiis & fluidorum lege versûs declivè Pylori orificium feruntur, Ventriculû secundarium ingressura, Duodenum intellige. Huc semel perducta, inchoata quidem sed diuturnioris in Ventriculo moræ defectu intercepta ipsorum Fermentatio aut Putrefactio, Bilis ac succi Pancreatici opportuna admixtione penitus compescitur. Heterogeneæ Chymi particule largiori jam fluido innatant, saponaceâ bilioli humoris virtute colliguntur ac uniantur, liquidumque partibus suis integrantibus homogeneum constituunt. Jam tenes Digestionis Mechanismum, tantòque hanc fore perfectiorem intelligis, quantò facilius fuerit instrumentorum ad id opus necessariorum applicatio.

III.

ORIS cavitas spatio inter utramque Maxillam à Naturâ relicto comprehensa, duplici dentium serie munita, volubili in omnem sensum musculo instructa, salientibus undequaque Salivæ rivulis irrigua, alimentorum prima Officina jure ac-

meritò debet appellari. Quam ibi patiuntur elaborationem cibi, *Masticationem* dicunt. Sic autem perficitur. Alimenta ore indita dentibus Incisoris dividuntur, Caninis si necesse sit discerpuntur, dilaniantur; mox contractione Linguae Molaribus subiiciuntur, ibidem actione *Buccinatoris* musculi detinentur, dissecta restituntur; tum Maxillae inferioris agitatione continuâ teruntur, subiguntur, in partes minutissimas rediguntur; interdem depluens salivæ latex eisdem commiscetur intimius; donec molliusculum adepta consistentiam, haud cessantibus Linguae motibus volutata in unum colligantur, ac Boli in modum efformentur ad Pharyngem usque propellenda. Mechanicum opus *Masticatio* mechanicis exercetur agentibus. Maxilla inferior quæ sola mobilis *Vellem* exhibet compositum primi generis (in quo scilicet movens potentia Hypomochlium inter & resistentiam sita est) fortissimis idè hinc & inde instruitur musculis *Temporali*, *Massetere*, *Pterygoideo* interno & externo. *Temporalis* seu *Crotaphites* à toto ambitu lineæ semicircularis ossium Bregmatis oriundus; inter duplicem Pericranii lamellam contentus, musculus est penniformis fibris confans carneis radii in modum dispositis, desinentibus in tendinem mediam musculi crassitiem occupantem, tandemque progrediendo chordam fortissimam æmulantem, juxta sulcum Apophysys Jugalis ossis temporum ad processum Coronoidem Maxillae inferioris progredientem ibique insertum, *Masseter* seu *Manforius* ex limbo inferiori Apophysys Zigomaticæ ossis Temporum ortus pergit versus inferiorem, fibrisque decussatis superficiei externæ anguli Maxillae inferioris firmissimè implantatur. Pterygoideorum internus alter ab Apophysys Pterygoideæ cavo maximè verò ab alæ exterioris facie internâ descendit versus angulum Maxillae inferioris, ejusdemque faciei internæ adhærescit. Externus ab externâ alæ ejusdem facie horizontalitèr tendit versus Apophyssem Maxillae Condyløideam, huicque inseritur. Octo illi musculi Maxillam inferiorem fursùm attollendo illamque modo in alterutrum latus, modo prorsùm, modo retrorsùm movendo, intercepta dentibus Molaribus alimenta premunt, conturunt ac comminuunt, eoque accuratius quò diutius alternatim illorum contractio continuatur.

IV.

TANTAM *Masticationi* ad Digerendum efficaciam tribuerunt Arabes. Ut illum animam suam odisse dixerint qui oderit *Masticationem*. Nec injuriâ. Ut enim primæ coctionis vitia in secundâ non emendantur, sic imperfectæ *Masticationi* non medetur prima Coctio; sed qualis fuerit alimentorum in ore subactio, talis erit & Chylificatio. Et profectò quis ab exactâ *Masticatione* plurima exurgere commoda non intelligit? Parotides Glandulæ, Maxillares, Sublinguales, aliaque multa Salivæ liquoris Secretoria hunc à naturâ fructum obtinent quo repetitis Maxillae inferioris motibus agitata ad Salivam uberius eruçantam invitantur. Hinc major accedit Cibis mollities, & ad fluiditatem concipiendam dispositio. Præterea diu continuatâ *Masticatione* Acr maximâ copiâ impeditur intra particulas alimentorum, numerosissimis quæ relinquunt inter se spatiolis sese insinuat, Digestioni egregiè famulaturus cùm Ventriculi calore expansus, obicesque molitus perrumpere ulteriorem Ciborum divisionem pariet. Alimenta exactius masticata minorem contrahentibus sese ventriculi fibris opponunt resistentiam, à succo Gastrico faciliùs solvuntur, in Duodenum perducta ob laxiorem sui texturam intimius à succo Pancreatico imbibuntur, à Bile penetrantur, & in fluidum homogœneum assimilantur. Quæ quidem omnia si deficiant, manca est & imperfecta Digestio. Enimverò si leviter tantum in ore conquantur Cibi, præsertim solidiores, jam Frustra constituunt majora, salivâ & aëre parcissimè imbuta, pondere suo fibris Ventriculi molesta, ob nimiam crassitiem à lymphâ Gastricâ difficillimè emollienda, Bilis energiam effugientia.

4

lucumque Nutritium ægerimè fundentia, huncque crassum & malè elaboratum, Patet ergò quàm rectè à quibusdam pronunciatum fuerit, bolum unicum ruditer masticatum difficiliùs concoqui à Ventriculo quàm decem optimè masticati. Tantò itaque est perfectior Digestio, quantò accuratior Masticatio.

V.

NEC ratione tantùm, sed & Experimentiâ adstruitur exactæ *Masticationis* ad perfectam Digestionem necessitas. Senes illos videas quibus periit amissa cum dentibus Cibos commolendi ac terendi facultas. Hos inter pauci Apepsia aut Bradypepsia, nulli Dispepsia non obnoxii. Cave insontem tunc incuses ventriculum, interimve nimium Bilem acuendam existimes, verùm alimenta præbeas non imparata, meliùs denegatæ *Masticationis* usum facillimis solutu alimentis suppleas, sua statim reddetur Digestioni perfectio. Exemplo etiam sunt Helluones, quibusque Venter est Deus; ii omnes *Masticationis* commoda ultrò negligentes, vitæque felicitatem ex Ventriculi distentione æstimantes, tantò difficiliùs Digerunt, quantò avidiùs vixque dum dentibus contracta, non tam deglutiunt quam vorant alimenta. Ne stupeas ergo quòd Gula servientibus frequentior sit Ventriculi per superiora quàm per inferiora exoneratio. Nec reponas, organis ad *Masticationem* necessariis carere prorsus universam Avium gentem. Diversas etsi quandoque sequatur Natura vias, sæpe nihilominus eundem attingit finem. Quod opus perficiunt dentes in Quadrupedibus & Piscibus, illud idem absolunt in quibusdam Volucrum speciebus lapilli quos deglutire amant, in omnibus specialis quidam Ventriculus robustis duobus musculis constans ac veluti carneus. Sed ad Hominem revertamur. Nonne fluidissima Chylique indolem jam referentia alimenta infantibus parat optima mater Natura; donec in germine latitantes adhuc dum dentes, omnino explicati, tantam adepti fuerint duritiem, ut cibis solidioribus confringendis ac commolendis, uno verbo ad subeundam in Ventriculo & Intestinis perfectam elaborationem præparandis valeant inservire?

Ergò quò Manducantur Accuratius, eò Coquuntur Perfectius Alimenta.

DOMINI DOCTORES DISPUTATURI.

- | | | |
|----------------------------------|--|--|
| M. Jacobus Couplez de la Motte. | M. Claudius - Josephus Gentil, Militarium Nosocomiorum ad Regis Exercitum Medicus. | M. Ludovicus - Alexander Viuillard. |
| M. Joannes Baptista Basserville. | M. Edmundus - Thomas Moreau. | M. Ludovicus - Guillelmus le Monnier, Consiliarius Medicus Regis ordinarius primarius designatus, Regiarum Parisiensis, Londinensis ac Berolinensis Academicarum Socius & in Horto Regio Botanice Professor ac Demonstrator. |
| M. Simon - Antonius Bringand. | M. Joannes-Baptista Thyrant. | M. Josephus-Exuperius Bertin, Supremi Valachia & Moldavia Principis, dum viveret, Medicus ordinarius & Regio Scientiarum Academia Parisiensis Socius Veteranus. |

Proponebat Parisiis MATTHÆUS-THOMAS LACASSAIGNE;
 Parisinus, Saluberrimæ Facultatis Medicinæ Parisiensis Baccalaureus,
 A. R. S. H. 1763. à sextâ ad meridiem.

Typis Viduæ QUILLAU, Universitatis & Facultatis Medicinæ Typographi, 1763.